








AESOPNI
GOLPORANG

L. M. HOLBROOK




1996






AESSORNI
 GOLFORANG
 DE THE BOOK



1898



AESOPNI
GOLPORANG

BY
L. M. HOLBROOK


1994

ABDINI
GOLFGRAND

THE
M. B. B. B. B.

Printed at :
Nabapress Pvt. Ltd.
66, Grey Street,
Calcutta-700 006

PERU ARO DO-KA



Changsao peru mangsa do-ka mangsani
ku-siko ruti dotsako balbite bilangenba bol
bipeko ba-eako nikaha. Uan angni, anga peru
ong-jama? ine chalakigipa peru chanchiaha.
Unon ua bolni ja-pangona re-ange aganaha,
Salam do-ka. Da-alde nang-ko nitobee nikake!
Nang-ni grangrang ching-chet ching-chet nama

aro nang-ni mikron rongchingsranga. Jekai nang-ni bimang gipin do-orangna bate nitobata indaken nang-ni ku-rangba knatobata ine anga chanchia. Nang-ko do-orangni Rani ine salam ka-na man-na gita changsa mangmang miko-pabo ine ua mol-molaha.

Do-ka skotangko de-doe, Ak! Ak! ine name mikona dakaha; indiba ua ku-sikko ku-angari-on ruti a-aona ga-akbaaha. Perusa uko chik-ka-soaiaha. Chu-ongnok mikona nangjaha, angni man-na nangakode man-aha ine chalaki-gipa peru aganaha. Ia rutini pal anga mik-kangchi na nang-na skiani mingsako agane on-a.

Tol-pinikgiparango ka-dongnabe.

DO-BIPA ARO MUKTA

Changsao do-bipa mangsa do-bimarangni gisepo dongpae dal-a dake gangcheng gang-cheng ichi uchi re-rurae romitingo maibakai rang-san megap ning-oniko maiba ching-chet-chet dakgipako nikaha. Gok! Gok! uan angna ine ua inaha. Unon ua ga-brite megap ning-oniko uko bikotaha. Uara saniba maibakai sarao gimaatgipa mukta ong-achim.

Na-a mandena gamchatgipa gam ong-naba donga, indiba anga an-tangde kerasa mukta-rangna bate mi rongsako namnikbata ine dal-a daggipa do-bipa aganaha.

Gamchatgipa bosturang uarangni gamchatani-ko uigiparangnasa gamchata.

SINGHONI PAL

Changsao singho mangsa, peru mangsa, matchru mangsa are se-el mangsa damsan sikar ka'na re'angaha. Uarang am'en am'en ja-man ki-tiko matchok mangsako chadike uko chike siataha. Da'o uarang mang-giminko maidake sualgen uko chanchiaha. Singho matchokko sikdape chadenge aganaha, Ia matchokko bak bri dakgen. Ia bak brioni skanggipa bak angnin ong-gen, maina matburungrangni gisepo angan dal-batgipa, dal-gipa raja ong'a, gnigipa bakara angni tik dake bichal ka'ani, gitamgipa bakara angni rikpaani, brigipa bakde atcha na-simangnin, indiba na-simangoni sawa pa'a re-bae angni mikkangoniko dangtape ni?

Uarangoni mangsaba mamungko aganna aro daknaba pa-jaha.

Peru ki-me saljole, Himangai ine mitu mitu matnange re'angaha, aro ua ka'sne knobregija inaha.

Dal-giparangni mikkango na'a bak manpanaba donga, indiba uamangni mang-giminko manpana amrongja.

SE-EL-ARO ALABOK

Se-el mangsa an-tangni chikgimin matchokko skelskel cha-mitingo maibakai be-enoni greng ge-sa uni gitokbuo kangdangaha aro ua uko minoksrangna ba ong-katatpilmaba man-jaha.

Uni gitokbu dongtopilgija saaha aro ua uni saako namatna cholko am-roroaha. Ua uni gronga matburungskako grengko oke galpilchina mol-molaha. Uko oke galgipanade jeko bi'a ukon on-gen ine ua ku-rachakaha. Bon-kamao alabok mangsa, joton ka'e nina ine inaha. Ua se-elko tom-tom dongate cheng-knako ama dipet ku-angchina aganaha. Unon alabok uni ro-gipa ku-sikko se-elni gitokbuchi sikataha aro uni ku-sikchi grengko rokreke rokreke okna man-aha.

Na-a da-ode ka-sapae nang-ni ku-rachakgimin boksisko on-ginokma? ine alabok sing-aha.

Se-el wagam chikmijile wakichengcheng dake aganaha, Chu-ongnikbo. Na-a nang-ni skoko se-elni ku-sik ning-chi donate saknagija ra-ongkatpilna man-aha. Ian nang-na chu-ongbea boksis.

ka-sae dakani aro mikbokani apsan nang-rimja.

GAME CHA-GIPA ARO CHIPU

Song damsao game cha-gipa saksani depante ch-puni ki-meko maibakai ga-sotmanaha. Rang-san chipu uko an-pile suon ua siaha. Pagipa ka-onange ruako ra'e chipuko ja-rik-angenba uni ki-meko den-sotaha. Uni gimin chipu game cha-gipani bang'a matchurangko sue una bang'a gimaaniko dake jakbikpilaha.

Unon game cha'gipa chipumung namgriktaiode nambatgen ine chanchie una cha'ani aro bija bitchiko uni dongani a'kol ku'mangona ra'angenba, Hai, da'ode an'chinga namgriktai-naha. Haida angni depanteko nang-ni sasti on'a aro angni matchurango a'jak sokani kakket ong'naba donga. Angni uko a'jak sokna joton ka'aniba kakket ong'chongmota. Da'o an'ching maina ripeng ong'piltaijawa? ine sing'aha.

Ong'ja, ong'ja, ine chipu aganchakaha, Nang-ni on'anirangko ra'angpilbo. Na'a nang-ni depanteni siako aro angaba angni ki'ine chotako mamung saloba gualna man'jawa.

Nang'ija dakako kema ka'na man'a, iudiba uko gualna man'ja.

BENG-BLOKRANG



Beng-blokrang kusi ong-bee uarangna kragipa chidipek dakgipa chibol damsao dong-

engachim. Uarang pilaknaba kenmangija ska gita bilchroke roengachim aro uarangko duk on-gipa pilakba dongjachim, indiba uarangi badiaba badiaba, An-chinga rajako aro krara sason ka-aniko nanga ine chanchie kusi ong-jaha.

Uni gimin uarang sal sao baltigipa saksako watate, Bilakbegipa Mite, chingona sason ka-gipa rajako watatbo ine mol-molataha. Uarang gokarang ong-a ine Mite nike dal-begipa boltongko chibolona galataha, ian tap ine chibolo ga-akaha. Beng-blokrang uarangni jatchio ia gam-ako knae janggi jama galpile kenbeaha. Aro uarang ia dal-begipa, ken-begnigipa bimangko nike rikamona katangtokaha. Uarang nie nie uni il-lenggijako nike uarangi mangsa ba manggni ka-dongbat-giparang boltongni sepangona re-andraaha aro uko dangdikna paaha. Indimangba ua il-lengjachim. Unon beng-blokrangni gisepo ka-dongbatsranggipa ua boltongni kosako bilgate bilchroke chrokna a-bachengaha. Unon pilak beng-blokrangba re-bae apsanke dak-paaha.

Adita salrangna uarangni jatchio donggipa raja boltongna mamungba simsakgijan salantian antangtangni kamrangko ka-angaha. Ja-mano uarang chanchie uarangni raja boltongko namniktajaha. Uni gimin uarangi mangsako Bilakbegipa Miteona watattaie

Chinga chingni kosako sason ka-gipa kragipa rajako nangchong-mota ine aganataha. Ian Bilakbegipa Miteko ka-onangataha aro ua alabok mangsako uarangona watataha.

Alabok an-tangni ro-gipa ku-sikchi beng-blokrangko sue mangsani ja-mano manggipinko gitok ro-de ro-de dake minokaha. Uarang mamungkoba dakna man-jaha.

Chwongnikgijani biteko nibo.

MENGGOTCHIRANG

Changsao songjinmani menggotchi songni menggotchiona rona re-angaha. Songni menggotchi sontolgipa aro tom-tomgipa ong-achim. Uo ka-rek aro wak granna agre mamung gipin cha-ani dongjachim. Indiba ua songjinmani menggotchiko mandera-e rimchaksoaha. Unon uni jako je je cha-ani donga ua jaksram-bee una kusi ong-en on-aha. Songjinmani menggotchini nikanio ua cha-ani ramram cha-an-san ong-aiachim. Uni gimin uko nie ua gingting songdoe aganaha, O jong, na-a indak-gipa cha-aniko cha-e maidake janggi tangna man-a? Beben songo iarangna agre gipin gipin cha-aniko man-rongjawa ine anga uia. Na-a ang baksa re-babo aro anga togipa, chi-gipa cha-aniko nang-na mesokgen. Na-a songjinmao dongode ruutgija salni jamanon

songo janggi tanganiko maikai chakna amaha uko aiao inmangen.

Menggotchirang indake agangrike manggnian songjinmaona re-chakatangaha. Uarang songjinmani menggotchini dongramona waltingahao sokeaha. An-ching rama chel-ako re-baahani gimin na'a okkrienggnok ine songjinmani menggotchi songni menggotchina aganaha.

Unon ua uko dal-begipa cha-ram nokdringona rimangaha. Uano chi'a toa cha'ani gitchea-rangko man'e manggnian okkribeani gimin kusi ong'e asonge cha'na a-bachengaha. Indiba uarang bakan randinga aro sing'ani ku-rangko knaaha. Songni menggotchi kene, Uaranga maiasai? ine sing'aha.

Uan nokni achakrangsa ine songjinmani menggotchi aganchakaha. Achakrangsa! Anga mi cha-mitingo indake gam-arangko knana sikja ine songni menggotchi aganaha. Unon rang-san do-ga obaaha aro achak manggni chanapbaaha. Menggotchi manggnian kenbee kataha aro neng-edikesa jokna man-aiaha. Salam ada, ine songni renggotchi aganaha.

Mai! na'a re-anggalgalginokma? ine songjinmani menggotchi sing'aha.

Oe, ine agane uade katangsrangaha.

*Kena gnang nambegipa cha-aniko cha'ana
bate tom-tome ramram cha-aniko cha'an suk
ong-bata.*

PERU ARO ALABOK



Changsao peru aro alabok ripeng dake rorimrongachim. Indaken peru alabokko mesal cha-china an-tangona okame ka-dinge rona ine padalek dakgipa cha-chakanio maiba ringaniko on-aha. Peru iako altuen srakna man-achim, indiba alabokde uni ro-begipa ku-sikni bon-chotgipakosan uano sositna man-aiachim. Ua cha-aniko cha-na skang je okkrian okkria mamung okadapgija re-angpilna nangaiaha. Anga duk ong-a; na-ade ringaniko namnikjakon ine peru aganaha.

Ka-sapae uani gimin jajrengnabe. Na-a ru-utgijan ang baksa cha-na re-angskagen inc anga ka-donga ine alabok aganchakaha. Aro indaken peruni alabokona re-angani salko tik ka-aha. Indiba uarang cha-ramona re-angon mesalna tarigimin pilak cha-anian ku-sik chongipa ro-gipa gurani ning-osa ong-tokachim.

Alabok uko ku:sik ro:gipachi jotbolbole cha:na man:oba, perude uni ku:sikko sikatna man:pajachim. Uni gimin ua gurani a:palo alabokni cha:ani ga:akakosan srakana agre mamungkoba man:pajaha. Anga indake cha:anina mamungkoba aganna nangnikja ine alabok aganaha.

Kamtangna krae man:pilna nanga.

SAGIPA SINGHO

Pilak matburungrangna bate singho bilakbatani gamin uko Matburungrangni Raja mingaha. Changsao singho mangsani tangani sal bon:nasiahaoa, sinasipile samitingo, ka:po, ka:po dake rang:site an:tang dongram rongkolni ku:mango tuengachim. Uni nokolrang, chong:motan gipin matburungrang, uni bilgri:roroangako nike uni sepangona re:baroroaha. Ua sinasiahaha ine nikon uarang gisiktangtango indine chanchiaha, Miknenga gitichamrangna da:o on:pilani sal. Uni gimin wak bipa mangsa re:bae uni wachingchi su:eaha; aro matchu bipa mangsa re:bae uni grongrangchi uko keaha, indimangba singho mamungkoba dakchakna amjaha. Unon gada mangsa mamungkenani dongjaha ine nike uaha re:bae. sinasigipa singhochi janggilatpilenba ja:samgnichi uni mikkango ga:tekaha. Singho ma:ame aganaha, Ian changgnigipa siani.

Ka:ponggrangsa sinasigipa rajako chonnika.

GADA ARO CHONGIPA ACHAK

Sal sao game cha-gipa saksa uni jillanirangko nina ine uarangni nolona re-angaha. Uarangni gisepo uni namnikbegipa, gakatronggipa gada mangsa gnangchim. Game cha-gipa baksa uni chongipa achak mangsa re-angpaaha. Ua achak bilchroke uni nokgipani jakko srake kusi ong-aniko mesokaha. Game cha-gipa uni chola jeponiko dangroke nie, maiba namgipa cha-aniko chongipa achakna on-aha. Unon ua asonge uni nokolrangna dakna nanggni kamko agansoaha. Rang-san chongipa achak nokgipani ja-pingo bilgate miksroksrok dake nie tue dongaha. Nokgipa achakni nachilrangko doktoptope ka-dingsmitaha. Gada iako nike uko kaani biltete jokaha. Jokenba ua chongipa achakni dakaniko ja-rikna a-bachengaha. Game cha-gipa aro uni samtangtango donggipa manderang uko nike ka-dinggagakaha. Gada bilchroke, nokgipani jakko srakna aro uni jakrangko nokgipani pakkreo done uni ja-pingona maldona joton ka-aha. Unon game cha-gipani nokolrang uko nike gol-dik aro silchonggenrangko ra-e uko dokataha.

Kragija dakaniara nitoani ong-ja.

DO-RONG ARO DO-ORANG

Sal sao indake ong-aha, do-rong mangsa aro gipin do-orang a-a gamgipa saksani a-bao

bilchrokchroke cha-aniko kolamengachim. A-a gangipa me-ka bitchirangko satengachim. Ua mandena gisik rakbo ine do-rong gipin do-skarangna aganaha.

Maina gisik rakna nanga, uara maiko dakenga? ine do-orang sing-aha.

Uni satenggipara me-ka bitchilrang ong-a. Uni gimin na-simang rongprakprakkon kolam-na simsakbo, ong-jaode na-simangna skimani ong chongmotgen ine do-rong aganchakaha. Indiba do-orang do-rongni katako knachakjaha.

Ka-sne ka-sne me-karang dal-dalbae briaha. Ja-manu nokgipa uarangko budu sakaha. Aro ua budurangkoa chek sikaha. Indake me-katchioniko dakgipa chekon do-rongni katako chonnigkipa do-orangoni bang-an nangaha. Anga na-simangna maiko agansoahachim? ine do-rong aganaha.

Namgijani bitchilko gimaatbo, ong-jaode ua dal-roroe nang-ko gimaatgen.

SE-EL ARO DO-BOK BI-SA

Do-bok bi-sa mangsa nokking kosako gakate nionatoa se-el mangsani re-baengako nikataha. Rang-san ua uni bobilko saie inaha, So-otgipa aro cha-ugipa, na-a maina ia namgipa manderangni nokrangni sepangona re-bara? Nang-ni namgija dakanirangko uiman-ahaoba

na'a maikai mikkang pa'taina ka'soka? ine do-bok bi'sa manengaha.

Na'a mangmang maiko agana ine se-el agan-chakaha.

Kenchakman-gija chel-ao dongode, pilakan ka-dongaia.

BOL DEN-GIPA ARO CHIPU

Sin-karini sal sao bol den-gipa saksa kamtang-
oni noktangona re-angpilingo suurini ko-
sako maiba go-ol gita gol-tektek dakako nikaha.
Ua sepangona re-ange nioa uara sin'ani gimin
sisranggimin gita dakpilgipa chipu mangsasa
ong'achim. Ua uko kolamaha aro ding'atna
man'na gita ka'bako kope nokchina re'angaha.
Ua nokningona sokarion chankolo wa'alni
sepango chipuko donaha. Bi-sarang uko ni-
time ka'sne ka'sne tangbapilengako nikaha.
Unon uamangoni saksa doktopna gonggong-
aha, indiba chipu skoko de'doe sre ote ua
bi-sako suatnasiengachim. Uni gimin bol den-
gipa ruako ra'algale apsa den'ari chipuko
tong'gni dake den-tongaha. Unikoa ua inaha.

Denggugiparango ka'sae dakpilani dongja.

KODAROK ARO TAMPI

Changsao kodarokgipa mande dongachim.
Ding-karini ding-begipa sal sao, kam matchote

ua asongengachim. Unon tampi mangsa bibae uni skoo bilwengwenge gisep gisep ba'e uko engengaha. Ua mande uni chonbegipa bobilko namedake enge bilsa dokaha, indiba uko nangani pal an'tangni skoosa jakpani 'ap inpile nangaha. Pile ua tampi uko dong-toattajaha, indiba inpako ua mande gisik gnange aganaha.

Chonchonbegipa bobilrangni gimin chanchi-chaode an'tangkosa duk on-pilaigen.

SAPAUANG ARO BENG-BLOKRANG



Changsao matburungrang sapaurangko a rikbeaha. Uarang ichi uchi katrurana nang-pilaha. Uarangona matburung mangsamangni rebaako nikode, uarang rang-san katrongachim. maina matburungskana namen kenbeahachim.

Sal sao uarang dolsa gure burungrangni ichi uchi katruraengako nikaha. Sapaurang

rang-san kenbee ki-me songgetgete sepango
 donggipa chibolona katangaha. Uarang indake
 kenkame dongana batede chibolo bilsrue
 sripe sian nambatgen ine chanchiaha. Indiba
 uarang chibol rikamona sokangahaon beng-blok
 jinma sapaurangni re-baana kenskae ki-sangkel
 ki-sangkel dake chiona bilwatangtokaha. Sa-
 paurangoni mangsa aganaha, Beben, ong-enga
 obostako badita namja ine chanclua inditade
 namgija ong-chongmotja.

*Pangnan nang-na bate jajrengbatgipa saoba
 gnangpiti.*

BENG-BLOK ARO MATCHU BOLOT

Beng-blok bi-sa chibolni rikamo asonge
 dongenggipa beng-blok budepana inaha, O apa,
 anga maiba bimang dal-begipa matburungko
 nikaha! Uan a-bri gita ong-pile dal-a, uni
 skoo grongrang aro uni ki-sango ro-begipa
 ki-me donga, aro uni ja-skeprang peggni daka.

Beng-blok budepa aganaha, Uara maisa
 ong-ginok, uan a-a ganggipa mande saksani
 matchu bolotsa. Ua inditaba dal-ja; ua angna
 bate on-tisa changrobatnaba donga, hitongkode
 angaba ua gita apsan dal-atna man-gen;
 angko nibone. Indaken ua balwako salopo
 an-tangko gangpingatenba sing-aha, Uara
 indita dal-ama?

Beng-blok bi-sa aganchakaha, O, una batede namen dal-bata.

Pil'e ua beng-blok budepa an-tangko gang-pingattaie, Ua matchu bolotara ia gita dal-ama? ine beng-blok bi-sao sing-taiaha.

Una bateba dal'a apa, dal-batkuenga ine beng-blok bi-sa aganchakaha.

Uni gimin beng-blok budepa ruute rang-site gangpingaten gangpingaten bon-kamao aganaha Anga uichong-mota ua matchu bolot inditana kingkingde, indiba unochachan ua bretaha.

An-tangko dal-nikaniara an-tangko gimaata.

DO-BAK

Do-orang aro matburunrangni gisepo dal-begipa dakgrikani ong-kataha. Dolgnichinin damsan tom-daktokahaoa, do-bak mangsa bachi chakpagen jajaaha. Uni ba-ramko re-pakanggipa do-orang uko aganaha, Ching baksa re-bapabo.

Anga matburungsa ine do-bak aganchakaha.

Ja-mano uni kokkimako re-pakanggenggipa matburunrang nigitoe aganaha, Ching baksa re-bapabo.

Anga do'osa ine do-bak aganchakskaaaha.

Maibakai bon-kamao dakgrikna nanggija namgrikaniko dakaha. Uni gimin do-bak do-

orangona bilbae uarangni katchaanio chapako man-pana skaha, indiba uarang pilakan uko a-rikataha, aro ua bile katangna nangaha. Unikoa ua matburungrangchi bilangaha, unoniba ua bakan katpilna nangaha, ong-jaode uarang uko tong-tang tong-tang dakatgenchim. Do-bak aganaha, Himangai, da-osa anga ma-sijok.

Uchiba uchiba dakpagijagipade darangniba ripeng ong-ja.

MATCHOK ARO SIKAR KA-GIPA

Changsao matchok mangsa chibolni chiko ringmitingo an-tangni namgipa bimangni ja-gringko chio nike mitelengachim. Ua aganaha, Ia gita pekam dake namgipa grongrangko bano nikna man-gen. Anga indaka skoko ra-bitna krae nambatgipa ja-a jakrangko man-ode namgenchim. Angni ja-a jakrang maina joldengsisi dakaia! Unochacha sikar ka-gipa saksa re-bae uko chrichi goataha. Matchok rang-san ta-rakbee katangaha. Bakan uni chonnikgimin ja-a jakrangchi sikar ka-gipani nikgijachina badeangnasiahachim. Indiba ua bachina katenga mamungba simsakjaha. Ua cheksi bing-gipa ondikgipa bolrangni okkuri joljol katangaha, indake katangmitingo uni nitobegipa bipek gnanggipa grongrang kang-bangaha. Uni gimin sikar ka-gipa uko altuae

srapeaha. Angkode! Angkode! ine matchok
chrike aganaha.

*An-chingna cholibatgipakosa an-chinga
chonnikronga.*

CHIPU ARO RET

Chipu mangsa malrooen malrooen silchi-
darerangko palram dokanona sokbaaha. Ua
daktako malangmitingon uano donggipa reto
malbritmanaha. Ua ka-onange, an-pile uko
uni bisigrak wagamrangchi suaha, indiba ua
jringipa silna mamung dukko on-na man-jaha,
aro ua indin uni ka-onangako watgalna nang-
aha.

*Janggi griko duk on-na joton ka-ara mamung
namgni gri.*

MANDE SAKSA ARO BOLGRIM

Sal sao mande saksa rua bolsako jako ra'e
bolgrim damsana re-angaha. Ua mande bol
cheksi gesako maiba kamni gimin nange uko
on-pachina ua bolrango bi-aha. Bolranga nam-
giparang ong-achim aro uarangoni bol pangsa
cheksi gesako una on-aha. Ua mande uko
sol'e uno rua chatesa bol pangsani ja-mano bol
pangsako den-angaha. Unon bolrang uarangni
bobilna nisiatani cholkosa on-aha ine uiaha.

An-chinga gokarang ong-chongmota ine bol
pangsa panggipinrangna aganaha.

Chanchichenggija daka kamde pilakan namya.

DO-KA ARO DO-DE



Do-ka mangsa do-derangni roronggipa sa-
raona re-ange uarangoni go-okgimin adita
ki-merangko man-aha. Ua uarangko uni ki-
meo jotchape do-derangchina gaorade-e re-
angaha. Uarangni sepangona re-angoa, uarang
uni togiako uiaha, aro uko bildape ga:chitchite
suaha aro ra-chakgipa ki-merangko sutete
galaha. Uni gimin ua do-kaskarangona re-
angpilana agre mamung nambata cholko nik-
jaha. Do-kaskarang uni kamko aro do-derang-
ni uko ga:chitchite suengako niktokachim.
Uni gimin uaranga uko apsan namnikpajaha,
aro uko chonnike inaha.

*Gipinoniko cha-ugipa ki-me mangmangchide
nitogipa do-o ong-na man-ja.*

ACHAK ARO SE-EL

Okkrie sinakenggipa ram-begipa se-el mai-bakai uni re-pakanggipika noko jilgipa achak mangsako grongaha. Ua achak aganaha, Aiao jong, nang-ni tik ong-gija cha-a ringachi na-a sigen. Na-a maina ang gita tom-tom kam ka-e, tik ong-e, cha-aniko man-na namnikja?

Biapko man-mangmangode angni mamung jechakani dongjawachim ine se-el aganchakaha.

Anga nang-na neng-mangija biapko tik ka-e on-na man-gen. Na-a ang baksa angni nok-gipaona re-bae angmtng kam ka-pabo ine achak aganaha.

Indaken se-el aro achak damsan, songjinmao-na re-angaha. Ramao se-el achakni kimil cham-angbeako nikaha. Uni gimin, Nang-ni gitok maini gimin indake ong-aha? ine se-el sing-aha.

O, uan mamungba ong-ja, uan angko walo kae donna gitoko patani biapsa. Uan natdudeta gita saa, indiba ruutgijan namnikangpilaia ine achak aganchakaha.

Indakesama? Indide anga re-naha salam ine agane se-el re-angaha.

Nokol ong-e milana bate jakgitel ong-e okkrie sian nambata.

OK ARO BE-ENNI BAKRANG

Be-enni bakrang chanchie niahaoa, uarang pilakan kamko ka-tokenga, indiba cha-ani

kaketkode oksan man-tokenga ine nikaha. Uni gimin sal sao uarang pilakan tom-tokaha aro ruutbee jegrikani ja-mano okba krara gita an-tangna kamko ka-na ku-rachakjaskal kamko ka-na jechaktokaha; ku-sikba cha-na jechakaha aro wagamrang kam ka-na dongjaha. Sal sa ba sal gnini ja-mano be-enni bakrang an-tangtangan bilgrirorangenga ine nikaha. Jak neng-esa il-lengna man-aha, aro ku-sik kokkrakkrak ran-srangaha aro ja-arang be-enni gipin bakrangko songchakna amjaha. Indake uarang il-lenggija tom-tom dongpaenggipa ok mangmangba an-tangna nanga kamrangko ka-paenga aro pilakan damsana kam ka-na nanga, ong-jaode be-enni bakrang bilagija bilgri-oroanggan ine uina man-aha.

Ku-cholsan dakachisa pilakan bilakna man-a.

MATCHOK ARO MATCHU JENG

Matchok mangsa achakrangni rikaoni matchurangni jengko donramona katange napsik-eaha aro uni grongrangni ku-chotrangna agre mamungkoba nikpilgijan megap chong-ao nape an-tangko pindapaha.

Dikdiksani ja-mano sikar ka-giparang re-bae, Saoba matchok mangsako nikahama ine sing-aha. Mesal cha-e neng-takenggipa jeng chim onggipa nokolrang niwilwale mamungkoba nikjaha. Uni gimin sikar ka-giparang re-angpilaha.

Uni ja-manu nokgipa nabaaha aro ua niwil-wale maiba ong-ronggijagipako nikaha. Ua megap chong-achiko mesoke aganaha. Awa ponggengeng megapni kosako nae dongeng-gipara mai? Jeng chimonggiparang matchokko nikaha aro bakan uko so-otaha.

Nokgipani nikkija mamungba donnua gri.

DO-DE ARO JUNO MITE

Do-de mangsa an-tangni nitoani kosako knatobatgipa do-oni kurangkoba man-na sik-beaha. Uni gimin ua Juno Miteo mol-mole bi-aha, indioba Juno Mite uni mol-molako knachakjaha. Ua mol-moltaitaiaha, indiba Juno Mite uan uni namnikbatgipa do-o ong-a ine mesoke una aganaha.

Na-a man-atangko chu-ongnikbo, saksan pil-akni gimin skanggipa ong-na man-jawa.

SIKAR KA-GIPA ARO GURE

Gure mangsa aro matchok mangsani gisepo jegrikani ong-kataha. Uni gimin gure matchokko a-jak sokna man-na gita sikar ka-gipa saksako mol-molaha. Sikar ka-gipa uko namnikaha, indiba ua aganaha, Na-a matchokko amna skode, nang-ko ia lagamchi dilna man-na gita ia silko nang-ni chengkningarngni gisepo donna aro an-ching rikmitingo anga nang-ni

kosako tom-tome dong-na man-na gita ia jinko nang-ni janggilo gatna on-na nanggen.

Gure iarangko namnikaha, aro sikar ka-gipa jinko gate lagamko pataha. Indaken sikar ka-gipani dakchakachi gure 'bakan matchokko srape man-aha. Da-o na-a angni ku-sik aro janggiloniko ia bosturangko gale re-angboaha ine gure sikar ka-gipana aganaha.

Ong-ja ripeng, ong-ja, na-a angni bilni ning-o donga aro anga nang-ko rakie kamko ka-atgen ine sikar ka-gipa aganchakaha.

Na-a an-tangko jakkalchina manderangna on-ode, uamang nang-ko uamangni kamo jakkalgen.

JENG DONCHAKANIO TUGIPA ACHAK



Achak mangsa sal jatchio tuani biapko am-mitingo matchu bolotna jeng donchakani bakosko nike unona bildoe uano donggipa me-gapni kosako suk on-g'e tusiaha. On-tisani ja-mano matchu bolot Nokgipani kamko matchot-

enba biaptangona re-bapilaha. Unon jeng donchakaniona re-ange megapko cha-na dakaha. Indiba achak mikrakatako man-ani gimin ka-onange chakate matchu bolotko sing-aha aro ua sepangona re-baoa uko chikna joton ka-aha. Ja-man ki-tiko matchu bolot megapko man-na ka-dongjae re-angaha. Ua re-angmit-ingo mitu mitu inaha.

• *Aiao, saoba saoba basakoba basakoba an-tangtangna jakkalani ong-jaoba sakgipinna on-na sikja.*

PERU ARO SINGHO

Peru matburunrangni raja singhoko nik-chengon namen kenbeee bolgrimchi katange dongnuaha. Changgipino ua nikaion ua kenmangija chel-ao dongge re-pakangako nirik-aha. Changgitangipao uarang mangsa mang-gipinona sepanggrike re-baaha. Peru sing-hoona tongtong re-bae uko salam ka-e un baksa roaha. Uni ma-drangrang maikai dongenga aro basako ua uko grongtaina man-gen ine uo sing-aha. Unon ua uni ki-meko moate mandera-bregija singhoko watangaha.

Agre mikkratgijara mandera:grikaniko komiata.

SINGHO ARO SOL-GIMIN BIMANG

Mande saksa aro singho mangsa manderangni aro singhorangni gisepo sawa bilakbata ine

jegrikengachim. Manderangni gisikni uia bilakbeani gimin singhona bate mande bilakbata ine mande jeaha. Ang baksa re-babo aro anga nang-na mesokgen ine mande singhona aganaha. Indaken ua singhoko Sorkarini nitogipa bariona rimangaha. Uano mande singhoko ame chengkna chitenggipa ro-ongko sol-gimin bimangko songe dona-dongachim. Uko nibo! ine mande singhona aganaha.

Uan nambea, indiba ua mamungkoba mesokja, maina ua bimang mandeni dakanisan ong-aia ine singho aganchakaha.

An-ching an-chingni ska gita bosturangko dake altuae mesokna man-a.

BOL ARO TILU

Changsao bol pangsa an-tangni ja-pango chagipa tiluna aganaha, Chongipa tilu na-a maina a-ao ture ja-dil su'e nang-ni kambeko ang gita bangbango rakatja?

Anga angni man-gimin rasongko chu-ongnika. Anga dal-begipa ong-jaoba angan jakkala.

Jakkala! Sawa angni ja-dilrangko pangpikgen aro angni kambeko a-aona be-gomatgen? ine bol tiluko chonnike aganaha. Indiba uni gaorade-a de-nangjaha: ua bakan skimna nangaha, maina ta-rakbegipa balminduri balbae uni ja-dilrangko pangpikaha aro choligi-

jagipa boltongko gita a'ao tujolataha. Indak-
mitingo chongipa tilu balwana gongdole balwa
balmanahaon chasrongpilaha.

Ongipa pangnan jokako man'a.

PERU ARO MENGGO

Changsao peru mangsa menggo mangsana
an-tangni bang-bea chalaki dakna changachi
uni bobilrangoniko an-tangko jokatna man'ako
gaorade'e aganengachim. Bobilrangoni jokani
chol ango mingritchasa donga.

Angode chol mingsasan dongaia, indiba anga
uachi jokronga ine menggo aganchakaha.
Uochacha uarang sikar ka-gipani achak jinma
uarangchina chabaengako niksoaha. Unon
menggode bolchi rang-san gakate kate bolni
cheksio an-tangko dongnuaha. Ian angni
janapgimin jokani chol mingsa ong'a. Na'ara
mai cholchi jokna man'a? ine menggo peruo
sing-skaaha.

Peru bang-bea jokani cholrangni gimin
chanchichae gisik bilding bildang ong'aha, aro
maiko dakgen ine chanchie jajajiji dakmitingo
achakrang uona sokaha aro uko changduulaha.
Ruutkujaon sikar ka-giparang srape uko goaha.
Menggo nionate pilakko niktoko aganaha.

*Channa amgija jokani cholrangna bate mingsa
nambatsranggipa jokani cholana nambata.*

MESNI KIMILKO GANGIPA SE-EL

Se-el mangsa mes nirikgipa aro uni achakrangni nitimani gimin mesko chikna neng-nikengachim. Indiba sal sao ua mes mangsani, kike galgimin bigilko nikaha. Unon ua uko an-tangni kosako gandapaha, aro uarangni gisepo re-angpaaha. Je mesni bigilko se-el ganachim ua mesni bi-sa mangsa uko jarikangaha. Se-el ua mes bi-sako adita chel-achi dilange uko chike cha-aha aro adita salna kingking ua mesrangko togie cha-e kusi ong-achim.

Bimangrang togigipa ong-a.

MANDE ARO BOLKO SOL-GIMIN MITE

Skangni salrango manderang bolrang, ro-ongrang aro sol-gimin miterangko olakirongachim. Uamangna patichina uarango bi-rongchim. Changsao indake ong-aha, mande saksa pagipani una on-gimin bolko sol-gimin miteo bi-rongachim. Aro uo jringring bi-beoba ong-ronga gita rasong grian ong-rongaiachim. Patiako man-jani gimin ua mande ka-onangbee sal sao bolko daggimin miteona re-ange uko apsa dokdate uko ga-akate gitokko betongataha. Ua mite tong-gni betongon ua maiko nikaha? Aiao! Bang-bea tangka miteni ok ning-oni wa-seona tang-srisrabaaha.

Bolko daggimin miteo mamung bil dongja.

PERU ARO DRAKA BITE



Sal sao sal ding-mitingo peru mangsa bite
 gnanggipa bario re-roromitingo chokchimsa,
 draka biterangni buduo nangengako nikaha.
 Ua inaha, Atcha ian angni ringna skako namat-
 na nambejok. Unon ki-sangchi ja-ku gnimang
 bitine kate, bilchrokdoaha, indiba ua chok-
 chimko soksrangjaha. Niwilwale ua pile, sa,
 gni, gittam ine chane, bildotaiaha, indiba man-
 tajaha. Pil-taitai uni mikbokenggipa chok-
 chimko man-na joton ka-aha, indiba man-na
 amjaha. Bon-kamao ua dontongna nangaiaha.
 Aro ua uni gingtingko salgichi songdoe aganaha,

Ia draka biterang mepa mesengbea ine anga uichong-mota.

An-tangni man-gijako chonntknade nengrabea.

NA-TOK RIM-GIPA

Changsao na-tok rim-gipa saksa uni mosokko ra-e chibimani rikamona re-angaha. Na-tok-rang ong-katbagen ine ka-donge ua uni mosokko sikaha. Na-tok mangsaba uni mosok sikana gingting nadoe cha-subajaha. Uni gimin ua uni chekko chiona galataha aro saldobaon uano na-tok gape nangako man-dobaaha. Ua mosokko ra-taje sikoa na-tokrang cheko bil-chrokchrokaha.

Aiao, da-ode na-simang angni sikmitingo chroka ine ua ka-dingsmite aganaha.

Oe, ine na-tok budepa mangsa aganchakaha.

Jensalo na-a mandeni bilo onga unon na-a uni ge-eta gita dakna nanga.

MES NIRIKGIPA BISA

Changsao me-a bisa saksa uni mesrangko dikbegipa burungni sepango, a-brini ja-pao nirikengachim. Sal gimikan ua saksasan ong-achim. Uni gimin ripengrangko aro adita kusi ong-aniko man-pana ine mingsa cholko chan chiaha. Ua sepango donggipa songona kat-ange, Se-el! Se-el! chababo! chababo! ine gam-e chrikwataha. Unon songni manderang

kamtangtango dongale uko dakchakna uona chagrimbaaha. Aro ja'mano mamung ong'ja ine uioba, mitam manderang aditana kingking un baksa roaha. Indake ua kusi onganiko manaha.

Sal gipino ua bi'sa apsan tol-attaiaha. Songni manderangba skang gita uko dakchakna chabataiha. Ianpako manderang uko tol-chongmotgipa ine rim'na manaha.

Aro sal gipino se-el re-babebeaha, aro mesrangko chikna a-bachengaha. Unon ua bi'sa skangna bate gam'e, Se-ell Se-ell angko dakchakechong-motbo ine chrikataha; indiba inpakode ua uamangko tol-taienga ine chanchie songni manderang pilakba chabajaha. Aro se-el ua bi'sani mesrangko ska gita chikdamdame cha'aha. Ua bi'sa grapsijosijoe aganahaon songni gisik gnanggipa manderang aganaha.

*Bebeko aganoba tol-ronggipakode bebean raja-
jawa.*

CHA·UGIPA ARO UNI MA·A

Changsao pante saksako cha'uana rim'aha, aro uko so'otna hukumko on'aha. Uko so'otna skang uni ma-gipako grongna ua biaha, aro uni ska gita dakna on'aha. Uni ma-gipa uona re-baahaoa ua aganaha, Anga nang'na maikoba sriksrik aganna ska.

Unon uni ma-gipa uni sepangona re-baaha aro uni nachilko onchokatabaon, ua uni nachilko chikkape chiktetsrangnasiachim. Uni sepango chadenggipa manderang kentok-beaha. Maina indake ka-saninggija daka? me saoba uo sing-oa ua inaha.

Ian uni sasti. Anga chonmitingo chongipa bosturangko cha-uchengaha, aro uarangko angni ma-gipaona ra-angrongaha. Indiba ua angko manenga aro sasti o'ani pal ka'dingesa aganaha, Iako pilakba nikjawa. Indake ong-ani a:selsa anga da-alo sina nanggen ine ua aganaha.

Unon kamal saksa aganaha, O me-chik, uan bebe ong'a, maina Gitel aganaha.

Bi-sako uni re-na nangni re'anio skie tarisoba aro bilsi bang-ahaoba, ua uoni ekjawa.

MANDE SAKSA ARO UNI JIKGIPA SAKJNI

Skangni salrango manderang bang'a jikrangko kimna man-achim. Ua somoio me-apa saksao jikgipa buchuma saksa aro me-tra saksa dongachim. Ua sakgnioni sakprakan una ka-sabeachim aro sakprakan uko an-tangni bilsi gita apsan ong-nikaiachim. Indiba ua mandeni kni bokangengahachim. Uni me-tragipa jikgipa iako nike namen namnikjaha,

maina indake kni bokani gimin ua uko agre budepa gita nikachim aro uni segipa ong-na kranikjachim. Uni gimin ua walanti uni knirangko chitate uni kni bokarangko tete galrongachim. Indiba jikmongma uni segipani kni bokangbatroengako nike namnik-beaha. Uni gimin pringanti uni kniko chitate kni gisimrangko pike galrongachim.

Ruutkujaon ua mande an-tangko kodarongrong dake nikaha.

Pilaknan on-aioae nang-ni on-ani bon-gen.

ANG-KE MANGGNI



Sal sao sal nammitingo ang-ke manggni uarangni dongani biaponi an-chengo rona ine ong-katbaaha. Unon ma-gipa degipana agan-

aha, Dede na'a maina gitcinge re-a? Na-a chadenge sronge re-na antangko ranta ka-bo.

Unon degipa aganchakaha, Ai, na'a angna skang dake mesokchengbo, unon anga nang-ko ja-rikna man-gen.

Dake mesokanian nambatsrangipa skiani onga.

SANGIPA ARO SE-EL

Jrip dongbo, na'a jrip dongjaode anga nang-ko se-elna on-atgen ine sangipa saksa uni ja-pingo donggipa chonggipa bi-sa saksana aganaha.

Uni indake aganmitingo se-el mangsa ua nokni kelkini sambako re-pakangengechim. Uni gimin ua nokni sepangona ka-sne maluange uano sengtimaha. Anga da-alo rasong gnang ine se-el gisiktango chanchiaha. Ua chonggipa bi-sa bakan grapchong-motge aro anga su-ubatgipa cha-aniko man-gen. Indake ua chonggipa bi-sa grapkujana kingking se-el sengtimchaaha.

Ruutkujaon beanbebe bi-sa grapna a-ba-chengaha, aro se-el re-bae kelkini mikkango uni ki-meko gon-gone sangipako niataha. Indiba ua me-chik kelkiko chipe dakchakaniko man-na chrikaha. Unon nokoni achakrang chaongkatbaaha. Ah, ine katanggipa se-el aganaha.

Bobilrangde ku-rachakoba pe-aia.

KI-SING ARO DO-GAMDOT

Ki-sing mangsa uni dongram biapko ding-
tangatna skengachim. Uni gimin ua do-gam-
dot mangsako una banga boksisko on-na
ku-rachake, Angko angni song gitalona ra-
angbo ine ua uo mol-molbeaha. Unon do-
gamdot iako dakna ku-rachakaha. Ua ki-
singko uni jakskilrangchi uni bikingo rake kepe
bilchakataha. Indake bilangmitingo ua do-ka
mangsako grongaha. Ki-sing cha-na toa ine
do-ka do-gamdotna aganaha.

Indiba biking rakbea ine do-gamdot aganaha.

Rong-brak bikingode binekatgen ine do-ka
aganaha. Do-kani aganako knae do-gamdot
rang-san kisingko rakgipa rong-brakni kosak-
ona galonataha, unon uni biking be-ropropaha.
Do-gamdot aro do-ka manggni suk ong-e uko
cha-aha.

Bobilni grangrango pangnaba bildonabe.

RIPENG SAKGNI ARO MAPIL

Ripeng sakgni burung joljol songreangeng-
achim. Ua songregiparang saksani ja-mano
saksa dake re-angengachim. Unon mapil
mangsa uamangko nike uamangona chabaaha.
Skanggipa mande ripengtango gisik ra-gija,
kenbee an-tangni giminsa chanchiaie bolo
gakate kate dongnuaha. Sakgipin an-tang

jokani mamung cholkoba nikjae, a-ao tumitale sia dakmikaha. Mapil uona re-bae uni ku-sikko uni nachilni sepango done gingsikchaaha. Indiba ua mande tom-tomsrange dongahani gimin manggisisa ong'a ine chanchie ua mapil mikoprete an'dildile uko wate re-angaha. Mapilrang sigimin be-enko dangtaprongjachim.

Unon bolo gakatgipa ripengtangona ong-onbae ka-dinge aganaha, Ua mapilara nangni nachilo maiko aganmituaha?

Uni ripeng aganchakaha, Ua mapil angna inaha.

Dukni salo nang-ko galchipgipa ripengode pangnaba ka-dongnabe.

MATCHU BOLOTRANG ARO SINGHO

Singho mangsa a-ba damsao cha-aniko am'e re-oroengmitingo, matchu bolot mangbrini cha-amengako nikaha. Bang'a changna ua uarangko chike cha-na joton ka-aha, indiba man-jachim. Ua sepangona re-baahaoa, mangsa manggipinchina ki-sangatgrike warachakani gimin jechipakni re-baoba, uarangi mangsasikni grongrangchi 'uko warachakna man-achim. Indiba ja-man ki-tiko matchu bolot mangbrini gisepo jegrikani ong-kataha; aro a-bani dingtang dingtang noksiko cha-amna mangprakprak re-ekangaha. Unon singho

uarangko mangprakprak chikna a-bachengaha
aro ruutkujaon bon'e chike cha'aha.

*Nangrimachi an'chinga chadenga, indiba
ekgrikachi ga'aka.*

NA-TOK RIM-GIPA

Na-tok rim-gipa mande saksa salgimik na-tok
rim'e chonbegipa na-tok mangsakosa man-
aiaha. O gitel, ka'sapae angko watbo ine
rim-gimin chonbegipa na-tok uo mol'molaha.
Da'o na'a angko cha-na-gita anga cha-topilgija
chonenga. Na'a angko chibimaona watpilode,
anga bakan dal-rorogen, unon suk ong'e, na'a
angko cha-na man'gen.

Ong-ja, ong-ja, na-tok bi-sa, anga nang'ko
da'o rim'aha. Iani ja'mano anga nang'ko
rim'taina man-ja'naba donga ine na-tok rim-gipa
aganaha.

*Jako man-gimin chongipa bostuan, man-
gija dal-gipa bostuna bate dal-bata.*

MIKBOKGIPA ARO MIKNENGGIPA

Changsao sakgni songsulrang Jupiter Miteni
mikkangona re-bae uamangni man-na skako
on-china bi'aha. Uamngoni saksara mikbok-
raskgipa aro sakgipinara mikengan gapgipa
ong'achim. Uni gimin sakgnina sastiko on-na
man-na gita Jupiter Mite sakgninan uamangni

bi-a gita on-aha, indiba jeko uamangoni saksa
bi-a uni changgniko uni songsul man-gen ine tik
ka-soaha.

Mikbokgipa sonaan gaggipa kuturi ge-sako
on-china bi-aha. Indiba uni noksul sonaan
gaggipa kuturi ge-gniko man-skaaha ine nikoa
ua kusi ong-ani pal duk ong-beaha. Unon
mikmenggipa mandeni bi-ani chol ong-achim.
Uni gimin noksulko suk ong-atjana gita uni
mikron rongsako ote galchina ua Jupiter
Miteo bi-aha, aro indake bi-ahani gimin uni
ripengni mikron ronggniba kana ong-srangaha.

Namgija skaranga an-tangni sastian.

SINGHONI BIGILKO KRUGIPA GADA



Changsao gada mangsa sikar ka-gipani ran-
china salo ramanggipa singhoni bigil kingsako
nikaha. Ua uko krue songtangona re-angaha.
Uni indake re-angmitingo uko niksogipa pilak

manderang aro jillanirang kene kataha. Ua
gaorade'e mikoon uni ku-sikko knae uko name
uiaha. Nokgipa ong-kate, manderangko ken-
atani gimin uko namen dokbeaha.

*Nitogipa gananirangchi dakjeoba, gokagipa
katarang gokagipako parakatgen.*

MANDE SAKSA ARO BURUNGNI MITE

Sin-karini wal sao mande saksa burungko
re-mitingo ramako name nikjae brangaha.
Ua brangmitingo burungni mite saksa uona
re-baaha. Mande brangaha ine burungni mite
uie uni dongchakramko waltuna on-na aro
pringo burungoniko dilangna ku-rachakaha.
Uamang burungni miteni dongramona re-
angmitingo ua mande uni jakrangko uni
ku-siko done ku-sikchi spoaha. Maina indake
spoenga? ine burungni mite uo sing-aha.

Sin-beani gimin angni jakrang jaktotaha
aro angni ku-ba uarangko ding-atna man-a
ine ua aganchakaha. Uni ja-mano uamang
burungni miteni dongchakramona sokangaha.
Ua mande okkribeaha ine nike burungni mite
bakan ding-begipa cha-aniko mandeni mik-
kango donaha. Indiba ua mande uko ku-siko
du-atna skang uko spona a-bachengaha. Mai-
na indake spoenga? ine burungni mite uo
sing-aha.

Ia cha'ani agre ding'a aro angni ku'ba uko ka'sinatgen ine mande aganchakaha.

Katangbo, apan ku'bachi 'ding'atna aro ka'sinatna changgipa mande baksa anga oe inpajawa ine burungni mite aganaha.

RAJAHAS ARO SONANI BITCHI

Sal sao mande saksa uni rajahas gringona re ange rimitchinchin ching'chet ching'chet bitchi rongsako nikaha. Ua uko de'tome niahaoa, setu gita jrima ine nike uko galang-nasiengachim, maina sa'oba uko togina dakaha ine ua chanchiaha. Indiba chanchipil'taie uko n'ktangchi ra'angaha aro name niahaoa sonachong'motni do'chisa ine uie namen .kat-chabeaha.

Pringanti uni rajahas sonani bitchiko chiringachim. Ua re'ange uaranko kole kole palenba bakan man'e cha'gipa ong'baaha. Ua man'e cha'gipa ong'an baksa mikbokbegipa ong'baaha. Rajahas bimani pilak bitchirangko changsano man'tokna ske ua uko rim'e rasotaha. Okko raprake niahaoa uno mamungkoba man'jaha.

Mikbokaniara an'tangna badeangronga.

KAM KA-GIPA MANDE ARO DO-O

Ding'karini wal sao kam ka'gipa mande saksa do'o mangsani knatobee mikoako kna-

time tuengachim. Ua do·oni mikoā knato·beani gimin ua mande do·oko man·na skaha. Uni gimin wal gipino ua atta sae uko rim·ahia. Anga nang·ko man·aha, na·a pangnajol angna mikona nanggen ine kam ka·gipa mande do·ona aganaha.

Ang gita do·ode kachani ning·ode pangnaba mikoja ine do·o aganchakaha.

Indakode anga nang·ko cha·gen. Mikona changgipa do·ode rutimung cha·na tobea ine anga aganako knaronga ine ua mande aganaha.

Ihing, angko so·otnabe. Angko jakgitel wat·bo, aro anga nang·na angni chongipa be·enna bate minggittam gamchatbegipa skianiko agan·gen. Unon ua mande ua do·oko wataha. Do·o bolni cheksiona bildoe bilangsrangna skang aganaha, Rim·gittanga man·gipani ku·rachakako mamung saloba bebera·nabe, ian skanggipa skiani ong·a Gnigipa, Nang·ni man·giminko rakibo. Gittangipa ku·patiani, Gimagimin bostuna pangnaba duk ong·nabe.

PERU, DO·BIPA ARO ACHAK

Jajong teng·gipa wal sao peru mangsa a·a gamgipa saksani do·noloniko do·oko am·roroengachim aro ua do·bipa mangsako uni sokgijagipa chugipa biapo ba·e dongengako nikaha. Namgipa kobol, namgipa kobol ine ua chrikaha.

Maine, mai, mai ong-a? ine do-bipa sing-aha.

Singho Raja pilaknan tom-tomaniko agan-prakataha. Da-ontaltal matburung do-oko chikna man-jawahana, indiba pilakan jongada gita namgrike damsang dongrimgen.

Uan namgipa kobol ong-a ine do-bipa agan-aha. Aro indake agane ua do-bipa an-tangni gitokko ro-ataha aro chel-achiko niataha. Anga saniba iachi re-baengako nikatenga. An-ching unaba ia namgipa kobolko knaatpana mangen.

Na-a maiko nikata? ine peru sing-aha.

Ua an-chingona re-baenggipa angni nokgipani achaksan ong-aia ine do-bipa aganchakaha. Peru ia katako knaarion katna am-aha. Mai, na-a da-on re-anggalgalengjok? Na-a dongkue namgipa kobolni gimin achakna aganpajawama? ine do-bipa sing-aha?

Anga indake dakna kusi ong-genchim, indiba achak Singho Rajani ge-etaniko knakujaengwa me anga kena ine peru aganchake katangaha.

Denggugipa pangnan an-tangko togia.

HERKULES MITE ARO GARI CHALAI-GIPA

Changsao gari chalaigipa mande saksa jrim-gipa malko gario gate a-dubekraragipa ramako salangengachim. Ja-man ki-tiko chaka bikbe

a·dubek ning·o nappipa biapona sokangaha. Gurerang gariko salbeahaoba, gari a·dubek ning·chi napsa napangroroaiaha. Uni gimin gari chalaigipa uni chalaiani gol·dikko gale ja·sku dipane bilakgipa Herkules Miteo bi·na a·bachengaha. O Herkules Mite, ia angni duk ong·ani somoio angko dakchakbo.

Herkules una mikkang pa·e aganaha, Chel mande, uano il·eng pil·eng daknabe. Chakatbo, aro nang·ni pakreo ua chakako donbo, unon na·a uko an·tangni bilchi mangen.

An·tangko dakchakgipako Isol dakchaka.

BASING TE·GNI



Chibimani rikamo dongipa basing te·gni gnangchim. Uarangoni te·sa a·ani aro te·gipinara pitolni basing ong·achim. Chipakore sokbaoa uarang te·gnian chibimao balbo·angaha. Unon a·ani basing bil ama dipet

pitolni basingoni chel'angna joton ka'aha. Indiba pitolni basing aganaha, Ripeng, kennabe ang nang-ko dokjawa.

Indiba anga nang-ona agre sepange re-angode anga nang baksa nangtingriknaba donga. Aro nang-o nangtingoba, ba na'ango nangtingoba, angasa duk ong-na nanggen ine a'ani basing aganchakaha.

Bilakgipa aro bilgrigipa ripeng ong-na man-ja.

PERU ARO GANGGUARANG

Peru mangsa chibima dilsako batani ja'mano uni ki'ne samtedamo bangkangaha aro ua uoni jitna man-jaha. Ganggu jinma uko dimtiptipe chike uui dukko bariataha. Okgipu mangsa rorambae peruni samtedamo bangkange duko ga'akengan baksanaba ganggu jinma uko dimtiptipe chikengako nike una ka'sachakaha. Uni sepangona re'ange, Aiao, amikasachim iara. Aiao, da'nang! Nang-ni an'chiko salopenggipa gangguarangko a'rikate anga nang-ko dakchakboma? ine okgipu sing'aha.

Nang-ko mitela okgipu. indiba indake dakna nangjawa ine peru aganchakaha.

Maina, maikaisa? ine okgipu inaha.

Na'an uia, ia gangguarang okkaman'aha, aro na'a uarangko a'rikatode, gipin okkrigipa

gangguarang bilbae angko siaona kingking
an'chi ong-atgen ine peru aganchakaha.

Dakchakna skode dakchaksrangbo.

PERU KI-ME CHONG-DOK

Changsao peru mangsani ki-me ja-gao nang-
aha aro an-tangko jokatna biltetoa ki-me
ja-ta dipet chottongsrangaha. Skangde ua
uni ripengrangna an-tangko mesokna kratcha-
nikachim. Indiba ja-man ki-tiko ua uni rasong
griani kosako ka-dongbate mesokna mang-
songaha. Uni gimin ua peruskarangko okame
tom-attokaha. Unon ua perurangni ki-
merangko sottongtokchina janapaha. Ua ki-
meara maikai uarangni bobil achakrangchi
rikako man-ode, dakchakani pal bil-dik bil-dak
dakatgipasa ong-achim uko mesoke agana
dakaha. Aro mangsa manggipin baksa asong-
rime romitingoba, ua ki-mede namgni gri ine
ukoba mesokaha. Choligijagipa ki-meko ra-
bitna mamung namgniko nikja ineba ua
aganaha.

Unon perurangoni budepabatgipa mangsa
aganchakaha, nama namade, indiba na-a
ki-metangko maiba a-selchi chottongatja-
haode, chingni mongsonggipa nitogipa ki-
merangko sottonga man-atna sikjawachimkon
ine angade chanchia.

*An-tang gitan kratcha-ako man-atpana daka-
niara an-tangan kratcha-dapako man-a.*

BUDEPA ARO SIANI

Kam ka-gipa budepa saksu kam ka'e bude-papilaha aro kom-chikchik dakaha. Sal sao burungo ua am-bolrangko am-engachim. Neng-bee aro bilgrie ua am-bol kasotko ongale chrike aganaha, Aiao, anga janggi tangchana sikjaha. Siani re-bae angko rimangosamung!

Ua indine aganarion, siani, chong-motan sko bikrok ge-sa, mikkang pa'e una aganaha, Na'a angna ma-ringa, anga nang-ko maiba dak-boma?

Am-bol den-gipa aganchakaha, Na'a ka-sapae ia am-bol kasotko angni 'pakkreona de-dotpagenma?

An-chingni ma-ringa an-chingona sokbaao bang'a salon kenpilronga.

SAPAU ARO UNI RIPENGRANG

Anga nang-ni ripeng ong'a ine bang'a jilanirang sapau mangsana aganrongachim. Indiba sal sao sapau achakrangni re-baengako knaaha aro ripengrangni dakchakachi jokgen ine ua ka-dongachim. Indaken ua gureona re-ange uni janggilo uko achakrangoniko chel-e re-angchina mol-molaha. Indiba ua uni nokgip-ana nangchong-motgipa kamko ka-na nanga ine agane jechakaha. Gipin ripengrangni gisepo mangsade dakchakchong-motgen ine auga uia ine ua aganaha.

Unon sapau matchu bimaona re-angaha aro uni grongrangchi achakrangko warachakgen ine ua ka-dongahachim. Indiba matchu bima aganchakaha, Anga duk ong'a, anga me-chik saksa baksa tik ka-gimin kam donga. Indiba an-chingni ripeng do-bok na'a jeko nanga uko dakgen ine anga uichong-mota.

Indiba do-bok uko uni janggilo gatode sapauna jokani ong-jawa ine kenchakaha. Aro mes bipa indake dakchakna namnikgipa ong'a ine aganaha. Uni gimin sapau mes bipaona re-ange ua a-selko aganaha, Angni ka-sara ripeng, changgipino anga man-gen indiba da-anpako anga jakdangdikpana sikja, maina achakrang mesrangkoba sapaurangko gita chika ine ua aganaha.

Ja-man ki-tiko sapau matchu bi-sako sing-aha. Indiba matchu bi-sa una bate dal-batgipa ripengrangan uko dakchakna man-jaode uade pangpang dakchakna man-jasrangwa ine je-chakaha. Aro inpako achakrang sepangbabe-ahant gimin sapau rang-san ta-rakbee katange an-tangko jokataha.

Ripeng bang-giparangde bang-a salon ripeng gri ong-pila.


DO-GAMDOT ARO CHRI

Changsao do-gamdot mangsa bangbango chubee bilroengachim. Unon rang-san ua

chrini gam·ako knaaha aro an·tangko bu-
 protsrangaha aro tangjawaha ine uiaha. An-
 chi joksolsole ua ka·sne ka·sne a·aona bilonaha.
 An·tangko bu·gipa chriko nioa chriko sronge
 goatna man·na gita an·tangoni go·okgimin
 grang ge·sako kachapako nikaha. Aiao, ine
 chrike sinasio inaha.

*An·ching an·tangtangko gimaatna an·chingni
 bobilrangna cholko on·ronga.*

RUBIGIPA ARO UNI SONA



Changsao rubigipa mande saksa dongachim.
 Ua uni sonako uni bario donggipa bol pangsani
 ja·pango gope donnuaha, indiba antiprako
 changprak uchi re·ange uko cho·pile rim-

rokroke janie ua roerongachim. Iako cha-ugipa saksa nikaha aro sal gipino sriksrik re'ange ua cho'e sonako ra'e katangaha. Rubigipa changgipino uni gamko janie rotaina re'angon ua a'kolrarana agre mamungkoba nikejaha. Ua duk man'bee uni kniko akorite gam'bee chrikaha. Unon uni pilak song-sulrang chabae uko duultokaha. Ua uni don-nugimin sonako maikai nina re'barongahachim aro da'o maikai uko cha'ugpia cha'uangaha uko uamangna aganaha. Na'a uanoniko mitam sonako pangnan ra'erongama? ine uamang-oni saksa sing'aha.

Ong'ja, anga uko nina mangmangsan re-barongaia ine ua aganchakaha. Indide re-bataitaie a'kolko nierongaibo, unon na'a apsan namgniko man'aikugen ine noksulrangoni saksa aganaha.

Jakkalgija donaiia gam dongjusrangode nam-bata.

SINGHO ARO PERU

Changsao singho mangsa sae sinasiaha ine aganprakaha. Matburunrangko re'bae uni bon-kamgipa katako aro skianiko knatimchina ua okamchimongaha.—Indake do-bok mangsa singhoni rong-kolona re'baaha 'aro ruute dong-dike knatimaha. Unon mes mangsa uni a'kol ning-china napangaha aro ua ong-katna skangan matchu bi'sa mangsa matburunrangni

rajani bon·kamgipa katarangko knatimpana napangaha.

Ruutkujaon singho namkale a·kolni ku·mangona ong·katbaaha. Aditana kingking peru mangsa a·palo sengsoengachim. Na·a maina mandera·aniko mesokna man·na gita napbapajaha? ine singho sing·aha.

Angko kema ka·pabo, anga nang·ona re·bagipa matburungrangni re·angpilako name nirikaha aro anga bang·ani napangako nika·haoba, mangsakoba ong·katpilako nikkuja. Napanggiparang ong·katbakujana kingking angade a·palo dongkuna namnikenga ine peru aganchakaha.

Bobilrangni ja·gaoni jokana bate napna al·tuabata.

GADANI TANING

Changsao singho aro peru damsan sikar ka·na re·angaha. Peru mesalko altuae man·na amna gita gadako togina mangsongaha. Singho aro gadani gisepo nangrimaniko dakna ine tol·e gadako okamatchina peru singhoko ge·etaha. Aro ua uni ge·eta gita dakoa gada kusi ong·e re·babebeaha. Indiba ua uarangni sepangbeaona re·baahaoa, singho gadako chadrapaha aro peruna aganaha. Ian an·chingni mesal ong·a. Anga dikdiksa re·ange tusiekuna, na·a iano nitime dongbo. Na·a angni chik·giminko dangtapnabene.

Indake agane singho re'ange tusieaha, aro peru nitime sengsoaha. Indiba singho re-angaoni ru-utbeahaoba, re-baja ine nike peru gadani taningko otrae cha'aha. Singho re-bapilahaoa, gadani taningni donggijako nikaha. Rang-san ua peuko randinge inaha, Na'a gadani taningko mai dakaha?

Taningne raja, uo taning dongja, taning dongode, ua nang'ni ja-gao ga'an ga-akjawa-chim.

Chalakigipa pangnan aganchakaniko tarie dona.

GOALA ME-CHIK

Goala me-chik saksa uni skoo baltin te-sao matchu sokko itchile antiona re-angengachim. Ua re-angmitingo dutko pale man-gimin tangkachi maiko dakgen uko chanchisona a-bacheng-aha. Ua an-tangna aganaha, Anga a'a gamgipani adita do-orangko bregen aro uarang pringprako bitchirangko chi-gen. Unon anga bitchirangko pamongni jikgipana palgen. Ua bitchirangko pale man-gimin tangkachi anga an-tangna tupi ge-sa aro nambegipa, nitobegipa chola kingsako bregen. Anga antiona re-angoa panterang re-bae ang baksa agangrikna namnikgen. Haida, gipin me-chikrang angna mikbokgen, indiba anga uamangko nikja dakaigen. Anga gipin me-chikrangko niketchie skoko indake rokrengen. Indake agan-

mitingon ua uni skoko janggilchina rokrekatmanaha. Unon baltin a-ona ga-ake matchu sok gimatokaha. Uni gimin ua nokchi reangpile pilak ong-a obostako ma-gipana aganaha. Uni ma-gipa inaha.

Pe-na skang nang-ni do-orangko chansonabe.

SAPAU ARO KI-SING



Changsao sapau mangsa gipin matburung-rangni mikkango antangni gong-rakani gimin rasong chae aganengachim. Ua inaha, Anga gong-rake katbebeode pangnaba mangsaba angko amkuja. Anga iano donggipa pilakkon ang baksa katusana ra-bia.

Ki-sing jajrenggija aganaha, Anga nang-ni ra-biako ra-chaka.

Sapau inaha, Che, na-ara maiko aganchrua, anga nang-ko rama gimik chrokwilwile re-na man-gen.

Ki-sing aganchakaha, Na'a amkujana king-king nang-ni rasongko dondikubo. An-ching katsusagenma? Indaken uarang katako tik ka'e katchakatangaha. Sapau, rang-san nikrik-pilgija bilwatangaiaha, indiba dondike ki-singko chonnikna man-na gita dikdiksa tusiao tusidapaha. Sapauni tusimitingo ki-sing uko batangaha aro jing-jet jing-jet katangengachim. Sapau tusiaoni mikrakahaoa ua ki-singko amani nisanona sepangbeako nikataha. Ua katsusao amna gita katsokjaha. Unon ki-sing aganaha.

Jing-jet jing-jet re-gipan susao ama.

SINGGA SIKGIPA

Dakgrikani ong-mitingo bobilni agre sepangona re-angahani gimin singga sikhgipa saksa rim-ako man-aha. Rim-giparang uko so-otnasiahaoa uni mol-molako knachakpachina ua bi-aha. Angade dakgripaja aro dakgrikani silchidareba angode dongpaja. Anga ia singgakan sikaia aro angni singga sikachi nasimang mamung dukkoba man-jaha. Uni gimin maina angko so-otna skenga?

Na'a antangan silchidarechi dakgrikjanaba donga, indiba na'a nang-ni singga sikachi nang-ni manderangko ka-dongate dakgrikna dilaha ine uamang aganchakaha.

Katarang kaprang ong-naba donga.

GADA ARO GURE

Gure mangsa aro gada mangsa damsan songreangengachim. Gure uni nitogipa jinna gaorade'e bilchrokchroke re:angengachim, aro gada jringipa malko neng-bee ra:angengachim. Angaba nang gita ong-osamung, mamungkoba dakna nanggija nama alko man'e nitogipa jinkosa ra:angna nangaiodechim ine gada skimaha.

Jeba ong-chong sal gipino dal-begipa dak-grikani ong-achim, aro sal bon-angahaoa gure mata bura man'e sinasiengachim. Uni ripeng gada uko re-pakbaaha aro gureni sinasiako nikaha. Minio anga guale aganaha ine gada inaha.


Nitoatoko man'e duko ga-akana bate ongipa kamko ka'e suk ong-an nambata.

NAGRAK DAKGIPA

Nitobegipa a-song damsao nagrak dakgipa mande saksa dongachim. Ua rokom rokom matburunrangni mikoako sninge manderangko ka-dingatrongachim. Uni pilak mesokanirangko mesokani ja-mano ua wak bi-sa gita mikoe sningaha. Uni mikoaka wak bi-sani mikoaka gita tiktak ong-ani gimin uni chola niq'o donnue wak bi-sa mangsako mikoatenga ine mande inma potaha.

Wak chong-motni mikoenga ong-ja ine ua
 jeaha. Knal atamo ianona re-batoktaibo, anga
 na-simangna uko mesokgen ine nagrak dakgipa
 mande aganaha. Manderang ka-dingahaoba,
 atam. gipino uamang re-bataibebeaha. Ua
 nagrak dakgipa wak bi-sa gita mikona joton
 ka-enga ine mande jinma chanchiaha, indiba
 skang gita name pian-jaenga ine uamang nikaha.
 Uni giinin ua uamangko chonnikenga ine chan
 chie, namnikjae uko ro-ongchi gotataha, aro Is,
 is, ine chonnikaha. Nagrak dakgipa mande,
 Na-siraang gokarang! Na-simang maiko sisao
 sisao ine chonnikenga? Uko niho! ine agane
 ua uni cholaoniko wak bi-sa chong-motko
 bikote de-doe mesokaha.

*Manderang bangu saton sningako mitela aro
 ong-chongmotako chonnika.*



The first part of the report is devoted to a description of the work done during the year. It is divided into three main sections: the first deals with the general work of the office, the second with the work of the various departments, and the third with the work of the individual employees.

The second part of the report is devoted to a description of the work done during the year. It is divided into three main sections: the first deals with the general work of the office, the second with the work of the various departments, and the third with the work of the individual employees.

The third part of the report is devoted to a description of the work done during the year. It is divided into three main sections: the first deals with the general work of the office, the second with the work of the various departments, and the third with the work of the individual employees.